

# La Pagina

## da Surmeir

62 avla annada | Nr. 39 | 25 da settember 2008

### AGRICOLTURA

Surmeir: concorrenza digls pi bels pros aint igl Parc Ela

## Salouf e Tinizong on igls pi bels pros

● **G.N.S.** Per l'amprema geda on igl Parc Ela e l'Uniu purila Alvra organiso en campiunadi digls pros. 25 pors da Surmeir èn sa participos alla concorrenza ed annunzgia 52 pros. Ena giuria è stada per igls pros anturn e giuditgia tenor differentis criteris.

Igl 2007 ò gia li an Svizra per l'amprema geda en campiunadi digls pros. Cò vogl per erueir igls pi bels pros, vot deir igl pros tgi correspondan igl pi fitg a tscherts criteris. Igl campiunadi naziunal ò do igl impuls agls responsabels digl Parc Ela d'organisar er an Surmeir ena sumigliainta concorrenza. An strètga collaboraziun cun l'Uniu purila Alvra è neida scretga or la concorrenza e sonda passada, a caschung dalla scargeda a Parsonz, èn igls pors tgi on igls pi bels pros nias onorifitgias.

**Far attent alla gronda diversitad**  
Cun la concorrenza an Surmeir ò igl Parc Ela e l'Uniu purila Alvra lia far attent all'impurtanza dalla gronda diversitad ainten igls pros e surtot er tge angaschamaint digl



Igls dus pors tgi on igls pi bels pros aint igl Parc Ela. Gian Sonder e Ricardo Schaniel (da san.).

### SURVISTA

#### 80% digls giasts èn Svizzers

Anfignen ossa è la staschung da stad stada fitg bunga aint igl cantun Grischun. Chegl vala er per igls hotels an nosa regiun. Luvro bagn on igls hotels surtot igl meis da fanadour ed igl meis d'avost. Nous vagn fatg ena bilantscha.

pagina 3

#### 40 onns directour

Silvio Zuccolini è siva digl 1968 directour digl spital da Tusang. Alla fegn da december vo el an pensiun. An 40 onns è sa mido bler aint igl sectour da sanadad. En discurs cuagl directour partent digl spital cun 150 ampluias.

pagina 4

#### Premis da rancunaschienscha

L'emda passada ò igl cantun publitgia igls noms dallas persungas tgi survignan en premi da rancunaschienscha ed en premi da promoziun. L'onour da survaigner en premi digl cantun on er treis persungas da Surmeir.

pagina 6

#### Avant davigl pacs tschevs

Cun l'ediziun dad oz vo a fegn la seria da tgatscha 2008. Noss catscheder da chest'emda è Agostino Giovanoli da Beiva. El vo siva digl 1956 a tgatscha e sa regorda tgi Beiva veva prest betg en tscherv avant 60 onns.

pagina 9



Er chels quatter pours cultiveschan bagn lour pros. La gronda lavour ò la giuria remunerò cun igl sagond e terz post ainten la rangaziun. (da san.), Gallus Brenn, Otmar Netzer, Giatgen Peder Demarmels e Niklaus Jud.

pour tgi è colliia cun cultivar bagn igls pros. Premias èn surtot nias pros cun las ples sorts flours ed er ena part dallas ervas. Cun chel campinadi ins ò dantant er lia tgi pours, giasts ed indigens steman e canoschan pi bagn la diversitad dallas bleras speztgas ainten igls pros.

#### I dava set criteris

Alla giuria, tgi ò piglia igls 52 pros sot la marella, on fatg part quatter persungas. Chegl èn Ueli Heinrich, pour, Filisour, Linard Sonder, student dad inschignier digl ambiain, Salouf, Madlaina Felix, ampredista da pour, Stierva e Regula Ott, manadra da project digl Parc Ela, Casti. Igls quatter experts on giuditgia igls pros tenor set criteris. Eneda on els dumbro la diversitad dallas ervas e scu sagond vurdo schi dat sen chel pro er ervas e flours tg'ins vei betg schi savens. Dumbradas èn pero er neidas las sorts dallas flours e dallas ervas. Valutada è dantant er neida la qualitat digl pastg, la grondezza e betg igl davos igl conturn digl pro. Igls criteris da valetaziun èn igls madems scu tar igl campinadi naziunal digls pros.

#### «Nous duvragh igl Parc Ela»

Igl campinadi digls pros an Surmeir è ia a fegn cun la rangaziun finala a Parsonz. La rangaziun finala è gist neida cumbinada cun la scargedada dall'Alp Naladas. Igl interess per l'occurrentza è sto fitg grond ed è la miglra reclama per l'agricultura. Eneda daple è sa

musso tgi agricultura e turissem von bagn a pèr. Corsin Farrér, igl president dall'Uniun purila Alvra e parsoura digl cunsegl grond, ò detg tgi la regiun dovra igl Parc Ela e mintgign porta ena tscherta responsabladad chegl tgi pertotga igl svilup digl parc. El ò er detg tgi sainza pros e pastgiras fiss la cuntrada monotona e lungurusa. I dovra dantant er las persungas tgi cultiveschan l'antiera cuntrada, ò detg Corsin Farrér.

#### A Spegnas è igl pi bel digls bels

Sa participos alla concurrenza on da 200 pours da Surmeir «angal» 25. Igl proxim onn chintan igls organistours cun daple interess dalla vart digls pours. La giuria ò valetò pros ainten las suandontas

vischnancas: Alvaschagn, Alva-gni, Lantsch, Filisour, Stierva, Mon, Salouf, Riom, Parsonz, Cunter, Savognin, Tinizong, Rona, Sur e Beiva. La giuria ò betg gia ena schi simpla missiun ed alla fegn finala catto igl pi bel digls pi bels pros a Spegnas sur Tinizong. Lò ò Ricardo Schaniel en pro cun la pi gronda diversitad, vot deir en pro cun 30 sorts flours (8 speztgas d'orchideas), bleras ervignas e speztgas d'animals. Dantant er igl conturn digl pro a Spegnas, igl pro tgi vign cultivò sainza grascha, cultem e puschigna è scu fatg per flora e fauna. Ricardo Schaniel ò en travagl cun 51 hectaras, sen igl bagn puril ò el 27 vatgas ed igl travagl magna el tenor las perscripziuns da bio.

#### Disvantatgs an Val Alvra

La categoria digls pros tgi vignan cultivos pi pac intensivs (saeas ed angal lados cun grascha) ò guda-gnea Gian Sonder da Salouf. Igl sies pro a Salaschins ò ena gronda surfatscha ed er cò on igls experts dumbro fitg bleras flours. An spezial diversas sorts gelgias. Igl pour da Salouf cultivescha en fons da 28 hectaras ed igl sies bagn puril è situò sot vischnanca. An igl croda bagn tgi tranter igls victours figurescha «angal» en bagn puril dalla Val Alvra. Ueli Heinrich, tgi ò fatg part alla giuria, ò detg tgi cura tg'ins vegia piglia igls pros sot la marella (zarcladour/fanadour) eran igls pros an Val Alvra per part gio betg ple an plagna flurizium. Chels pros sur 1500 m sur mar dantant sa preschentavan anc dalla sia miglra vart. Igls pros digls pours tgi on gudagnea la concurrenza èn tots situos sur 1500 m sur mar. Cò ins vegia dad eir sur igls codeschs per manar tras ena concurrenza regulara, ò menziuno igl pour da Filisour. An ena moda u l'otra ins veglia er sviglier daple interess tar igls pours per la concurrenza, ò menziuno Ueli Heinrich.

#### Rangaziun

*Pros extensivs*

1. Ricardo Schaniel, Spegnas, Tinizong
2. Niklaus Jud, Tussagn, Savognin
3. Giatgen P. Demarmels, Cresta da Lai, Parsonz

*Pros pi pac intensivs*

1. Gian Sonder, Salaschins, Salouf
2. Otmar Netzer, Rudnal, Savognin
3. Gallus Brenn, Marmels, Stierva

*Premi spezial pale planeiva*

Mario Baltermia, Sars, Salouf



La giuria tgi ò piglia igls pros sot la marella. (da san.), Madlaina Felix, Ueli Heinrich, Regula Ott e Linard Sonder.